

四庫全書

集部

欽定四庫全書

集部

明詩綜卷三

詳校官中書臣涂日煥

主事銜臣徐以坤覆勘

總校官降調編修臣倉聖脉

校對官庶臺臣潘曾起

謄錄監生臣李克文

欽定四庫全書

集部八

明詩綜

總集類

提要

臣等謹案明詩綜一百卷

國朝朱彝尊編彝尊有經義考已著錄明之詩  
派始終三變洪武開國之初人心渾朴一洗  
元季之綺靡作者各抒所長無門戶異同之  
見永樂以迄化治沿三楊臺閣之體務以春

容和雅歌詠太平其弊也冗沓膚廓萬喙一  
音形模徒具興象不存是以正德嘉靖隆慶  
之間李夢陽何景明等崛起於前李攀龍王  
世貞等奮發於後以復古之說遞相唱和導  
天下無讀唐以後書天下嚮應文體一新七  
子之名遂竟奪長沙之壇坫漸久而摹擬剽  
竊百弊俱生厭故趨新別開蹊徑萬厯以後  
公安倡識說之音竟陵標幽冷之趣么弦側

調嘈囀爭鳴佻巧蕩乎人心哀思關乎國運  
而明社亦於是乎屋矣大抵二百七十年中  
主盟者遞相盛衰偏祖者互相左右諸家選  
本亦遂皆堅持畛域各尊所聞至錢謙益列  
朝詩集出以記醜言偽之才濟以黨同伐異  
之見逞其恩怨顛倒是非黑白混淆無復公  
論曩尊因衆情之弗協乃編纂此書以糾其  
謬每人皆畧叙始末不橫牽他事巧肆譏彈

里貫之下各備載諸家評論而以所作靜志  
居詩話附於後雖隆萬以後所收未免稍繁  
然世遠者篇章易佚時近者部帙多存當亦  
隨所見聞不盡出於標榜其所評品亦頗持  
平於舊人私憎私愛之談往往多所匡正六  
七十年以來謙益之書已漸滅無遺而彛尊  
此編獨為詩家所傳誦亦人心彛秉之公有  
不知其然而然者矣乾隆四十六年四月恭

校上

總纂官臣紀昀臣陸錫熊臣孫士毅

總校官臣陸費墀

--	--	--	--	--	--	--	--



欽定四庫全書

明詩綜卷一

翰林院檢討朱彝尊編

太祖高皇帝

三首

帝諱元璋姓朱氏字國瑞濠之鍾離東鄉人元

至正十一年辛卯起兵丁未稱吳元年戊申建

元洪武在位三十一年崩葬孝陵

在應天府治東北鍾山之

陽永樂元年上尊謚曰聖神文武欽明啟運俊

德成功統天大孝高皇帝廟號太祖嘉靖十七  
年改上尊謚曰開天行道肇紀立極大聖至神  
仁文義武俊德成功高皇帝有御製詩集五卷

神鳳操

鈞天奏兮列丹墀俄翩翩兮鳳皇儀  
歛翹翔兮棲梧枝  
彼觀德兮直為我辭

鍾山賡吳沉韻

嵯峨倚空碧環山皆拱伏遙岑如劍戟  
邇洞非茅屋青

松秀紫崖白石生玄谷巖畔毓靈芝峯頂森神木時時  
風雨生日日山林沐和鳴盡啼鶯善舉皆飛鵠山中道  
者禪隴頭童子牧試問幾經年答云常辟穀

春望牛首

遙岑峙立勢蒼然春日鶯啼景物鮮疊嶂倚天江月外  
三山映帶石城邊

劉基曰皇帝提一旅之衆龍飛淮甸不十年間  
奄有區宇自古以來武功之盛未之有也及夫  
萬幾之暇作為文章舉筆立就莫不雄深宏偉  
言雅而旨遠真所謂天生聰明可望而不可及

者矣。宋濂曰：皇帝臨御以來，用人文化，成天下天縱聖能，形諸篇翰，揮灑之際，不待凝神而思。若淵泉有長江大河，一瀉萬里之勢，自然度越千古。郭傳曰：自漢而下，興王代作，然文經武緯，一弛一張，率不能兼濟其美。惟唐太宗以兵力定亂，及踐祚之後，詞章奮發，論者以其雕竒鏤彩，徒與騷人韻士爭錙銖之巧。惟皇上以一旅取天下，不數年間，混一南北，至萬幾之暇，復游心道學，志存詩書，寓辭竹帛，親搦管翰，意無停機。一揮數千百言，粹然出於情性之正。解縉曰：臣少侍高皇帝，早暮載筆墨楮，以俟聖情。尤喜為詩歌，睿思英發，雷轟電燭，玉音沛然。數千百言，一息無滯。臣輒草書連幅，筆不及成，點畫上進，才點定數韻而已。或不更一字，故嘗喜誦古人鏗錡炳朗之作，尤惡寒酸呶嚶齷齪鄙陋，以為衰世之調，為不足觀。詩僧宗泐進所

精思刻苦以為得意之作百餘篇上一覽不竟  
日盡和其韻雄深闊偉下視泐詩真大明之於  
燭火也陸釵曰洪惟太祖應天順人創業垂  
統巍乎成功煥乎文章稱盛美矣鄭曉曰上  
初不識書每退朝暇延接儒士講論經典又取  
古帝王嘉言善行書之殿廡出入省視作為文  
章揮筆立就或命侍臣立榻下操觚授詞混混  
千言皆淳雅高簡洞達物情動引經史足法萬  
世如飢渴之於飲食每得儒臣皆待以腹心帷幄  
朝夕諮訪不倦至於解析經義又多天縱神啓  
有非老師宿儒之所能及者朱國祚曰高皇  
帝詩發乎天籟自然成音當日賡歌颺言匪僅  
唐吳樂宋四學士而已若達魯與權吳伯宗劉  
仲質張翼宋遂朱芾桂慎戴安王釐周衡吳詰  
馬從馬懿易毅盧均裴植李容韓文輝曹文壽

單仲石諸臣進詩咸膺其韻今諸臣之作  
十九無聞而聖藻長垂宇宙高矣美矣

靜志居詩話孝陵不以馬上治天下雲雨賢才  
天地大文形諸篇翰七年而御製成集八年而  
正韻成書題詩不惹之菴置酒滕王之閣賞心  
胡閨蒼龍之詠擊節王佐黃馬之謠日歷成編  
和黃秀才作大官設宴醉宋學士有歌顧天  
祿經進詩篇披之便殿桂彥良臨池聯句嬾於  
颺言韻事特多更僕難數惟其愛才不及因之  
觸物成章宜其開創之初遂見文明之治江左  
則高楊張徐中朝則詹吳樂宋五先生蜚聲嶺  
表十才子奮起閩中而三百年詩教之盛遂超

軼前  
代矣

成祖文皇帝 一首

帝諱棣高皇帝第四子初封燕王之國北平建

文元年稱兵靖難四年入金川門建文帝自焚

或傳帝即位革除建文年號稱洪武三十五年

踰年建元永樂在位二十二年崩於榆木川葬

長陵

在昌平州北一十八里天壽山

謚曰體天弘道高明廣

嘉靖

十七年更廣為肇

運聖武神功純仁至孝文皇帝廟號

太宗嘉靖中更成祖有御製集

勃泥長寧鎮國山詩

實錄永樂六年十二月丁丑遣中官張謙行人  
周航護送嗣淳泥國王遐旺等還國初故淳泥  
國王麻那惹加耶乃言蒙朝廷厚恩賜封王爵  
國之境上皆屬職方而國有後山乞封為一國  
之鎮至是其子遐旺復以為請遂封其山為長  
寧鎮國之山命謙等即其地樹碑上親製文系  
之以詩

炎海之墟淳泥所處煦仁漸義有順無忤悽悽賢王惟  
化之慕導以象胥適來奔赴同其婦子兄弟陪臣稽顙  
闕下有言是陳謂君猶天遣其休樂一視同仁匪偏厚  
薄顧茲鮮德弗稱所云浪舶風檣實勞懇勤稽古遠臣



順來怒起以躬或難矧曰家室王心亶誠金石其堅西南蕃長疇與王賢矗矗高山以鎮王國饒文於石懋昭王德王德克昭王國休寧於萬斯年仰我大明

沈德符曰文皇帝封外國山者凡四永樂三年十月封滿剌加國西山曰鎮國山四年正月封日本國鎮山曰壽安鎮國之山六月十二月封淳泥後山曰長寧鎮國之山十四年十二月封柯枝國中山曰鎮國山皆出御製詩文以炳耀海外且詞旨雋斷非視草解楊諸臣所能辦因思唐文皇兵力僅伸於漠北而屈於遼水若文皇帝威德直被東南古所未賓之國矗矗萬禔所無也

詩話長陵稱兵靖難踐位之後加意人文成均  
視學有碑闕里褒崇有述以及姑蘇寶山之石  
武當太岳之宮靡不親製宸章勒之豐碣而又  
五經四書性理大全有書聖學心法有書大典  
有書文華寶鑑有書為善陰騭有書孝順事實  
有書務本之訓有書不獨紀之以事抑且系之  
以詩至于過兗州則賜魯藩于吳則壽榮國交  
趾明經甘潤祖等一十一人庶常吉士曾榮等  
二十八宿咸承寵渥三勒石於幕南之廷四建  
碑于海外之國此謚法之所以定為文與由是  
文子文孫復加繼述內閣則有三楊翰林則有  
四王尚書則東王西王祭酒則南陳北李觀燈  
侍宴拜手膚歌嗚呼盛矣

仁宗昭皇帝 二首

帝諱高熾成祖長子建元洪熙在位一年崩葬

獻陵

在天壽山  
西峯之下

謚曰敬天體道純誠至德弘文

欽武章聖達孝昭皇帝廟號仁宗有御製文集

二十卷詩集二卷

冬至賜贊善徐好古

清朝盛文治輔德資儒者念彼筋力倦趨朝諒非宜賦  
詩有佳致納誨多良規起予德深趣歡懷浩無涯新陽  
屆初復况此承平時酬勞有尊酒庶以勞期頤

池亭納涼

夏日多炎熱臨池憩午涼  
雨滋槐葉翠風過藕花香  
舞燕來青瑣流鶯出建章  
援琴彈雅操民物樂時康

詩話獻陵天稟純明雅志經術東朝監國命徐  
贊善善述纂尚書直指進講詩成亦命善述改  
竄令旨呼其字而不名又嘗與曾少詹榮膺和  
如江樓秋望詩云蘋洲晴亦雪楓岸晝常霞絕  
似唐太宗設享年加永則  
成功文章魏煥何如焉

宣宗章皇帝

九首

帝諱瞻基仁宗長子建元宣德在位十年崩薨

景陵

在天壽山東峯之下

謚曰憲天崇道英明神聖欽文

昭武寬仁純孝章皇帝廟號宣宗有御製文集

四十四卷詩集六卷

猗蘭操

昔孔子自衛反魯隱居國中見蘭之茂與衆草  
伍自傷不逢時而託為此操予慮在野之賢有  
未出者故擬作焉

蘭生中谷兮曄曄其芳賢人在野兮其道則光嗟蘭之

茂兮與衆草為伍嗚呼賢人兮汝其予輔

思賢詩

有序

宣德九年正月

予嗣守祖宗大位夙夜兢惕思惟致治之道必有賢臣相與贊輔雖屢詔求賢然恭默之思未已乃作詩以著予志詩曰

天命有赫付畀萬方肆予承之夙夜弗遑亮天之工其責在予亦惟求賢以作心膺堯舜大聖咨于臣鄰湯武致治敷求哲人稷契臯夔周召伊傅同德一心以匡以

輔惟時匡輔百工允釐治效之隆臻于皞熙悠悠我心  
念之勿置欲得羣賢以弼予治告言惓惓束帛戔戔命  
彼皇華歷于丘園庶幾多才拔茅連茹奮其功庸翼我  
王度惟天昭昭維嶽降靈篤生賢哲聿馳駿聲啓心沃  
朕以迪先德揚其耿光有永無斁

賜許廓巡撫河南

實錄許廓字文超河南襄城人由國子生授錦  
衣衛經歷擢工科給事中轉鴻臚左寺丞升兵  
部右侍郎洪熙元年轉左侍郎宣德六年升兵  
部尚書嘗扈從北征董饗運交趾入職方朝廷

遣廊往覆實戶口田賦尋召還後命招撫河南流民歸者數萬戶尚書張本卒以廊代之

河南百州縣七郡所分治前歲農事缺旱潦始復繼衣食既無資民生曷由遂顧予位民上日夕懷憂媿爾有敦厚資其往勤撫字徙者必輯綏饑者必賑濟咨詢必周歷毋憚躬勞動虛文徒瑣碎所至皆實惠勉旃罄乃誠庶用副予意

憫農詩示吏部尚書郭璉

雷禮列卿紀郭璉初名進字時用保定新安人由國子生出身永樂初為戶部主事歷遷福建



參議山東參政進工部右侍郎改吏部洪熙初  
兼少詹事宣德初命掌行在詹事府事進尚書

農者國所重八政之本源辛苦事耕作憂勞亘晨昏豐  
年僅能給歉歲安可論旣無糠覈肥安得縕絮溫恭惟  
祖宗法周悉今具存遐邇同一視覆育如乾坤嘗聞古  
循吏卓有父母恩惟當慎所擇庶用安黎元

示戶部尚書夏原吉

關中歲屢歉民食無所資郡縣旣上言能不軫恤之周  
禮十二政散貨首所宜給帛遣使者發廩飭有司臨軒

戒將命遠徃毋遲遲命下苟或後施濟安所期吾聞有道世民免寒與飢循已不遑寧因請書媿詞

捕蝗詩示尚書郭敦

雷禮列卿紀郭敦字仲厚東昌棠邑人洪武癸酉中鄉試後入太學擢戶部主事出知衢州府庶務畢舉召為監察御史升河南布政司左參政調陝西以禮部尚書胡濙薦擢禮部右侍郎巡撫順天等處洪熙初降太僕卿旋進戶部左侍郎兼詹事府少詹事宣德二年升戶部尚書

蝗蝻雖微物為患良不細其生實蕃滋殄滅端匪易方

秋禾黍茂芄芃芃各生遂所忻歲將登奄忽蝗已至害苗

及根節而況葉與穗傷哉隴畝植民命之所繫一旦盡  
於斯何以卒年歲上帝仁下民詎非人所致修省勿敢  
怠民患可坐視去螟古有詩捕蝗亦有使除患與養患  
昔人論已備拯民於水火勗哉勿玩愒

### 減租詩

實錄宣德七年三月庚申朔勅諭行在部院近  
年百姓稅糧遠運艱難官田糧重艱難尤甚自  
宣德七年為始但係官田塘地稅糧不分古額  
近額悉依五年二月勅諭恩例減免中外該管  
官不許故違奉旨上退朝御左順門謂尚書胡  
濙曰朕昨以官田賦重百姓苦之詔減十之三

以蘇民力嘗聞外間有言朝廷每下詔蠲租稅而戶部皆不準甚者文移戒約有司有勿以詔書為詞之語若果然則是廢格詔言壅遏恩澤不使下流其咎若何今減租之令務在必行書曰民惟邦本本固邦寧有子曰百姓不足君孰與足卿等皆士人豈不知此朕昨有詩述此意卿當體念勿忘也六月戊子朔知蘇州府事況鍾上言近奉詔書官民田地有荒蕪者召人佃種官田準民田起科無糧者勘實除豁租額臣勘得覽山等縣民以死徙從軍除籍者三萬三千四百七十二戶所遺官田召人佃種應準民田科者二十九百八十二頃其間應減秋糧一十四萬九千五百一十石已嘗申達戶部未奉處分况官田有没入海者糧額尚在乞皆如詔書除豁從之七月戊午戶部奏直隸松江府屬舊設官田宜準民田例起科古額官田積年逋

負稅糧請蠲以甦民困上從之仍  
命今後各處官田糧俱準此例

官租頗繁重在昔蓋有因而此服田者本皆貧下民耕  
作既勤勞輸納亦苦辛遂令衣食微曷以贍其身殷念  
惻予懷故跡安得循下詔減十三行之四方均先王視  
萬姓有若父子親茲惟重邦本豈曰矜吾仁

### 憫旱詩

實錄宣德六年乙酉上以天久  
不雨禱祠未應憂之作憫旱詩

亢陽久不雨夏景將及終禾稼紛欲槁望霓切三農祠

神既無益老壯憂忡餽粥不得繼何以至歲窮予為  
兆民主所憂與民同仰首瞻紫微籲天攄精忠天德在  
發育豈忍民瘝痼施霖貴及早其必昭感通翹跂望有  
渰興以蘇疲瘥

草書歌賜程南雲

有序

宣德七年二月

朕幾務之餘游心載籍及徧觀古人翰墨有契  
於懷賞賦草書歌以寓意焉以爾日侍之勞書  
以賜之

草書所自何所授初變楷法為章奏當時作者最得名  
崔瑗杜度張伯英三人真蹟已罕見後來繼之有羲獻  
筆端變化妙入神逸態雄姿看勁健風驚電掣浮雲飛  
蛟龍奮躍猛虎馳漢晉草法千載師張顛藏真亦絕奇  
一代精藝才數輩遺墨千人萬人愛固知頓挫出腕力  
亦用飛動生神采古來篆籀今已謫何況隸草謠愈多  
吾書豈必論工緻誠懸有言當默識

何喬遠曰章皇寤寐思賢未嘗一日去書下筆  
蠡涌皆傳修齊治平之道翰墨圖畫隨意所在

盡極  
精妙

詩話景陵當海宇承平之日肆意篇章嘗于九年元夕羣臣觀燈各獻詩賦彙成六冊惜今已無存即所遺御製集諸詩視民如傷從善不及宜薛祿武人比之南仲山甫而拊心感泣也

英宗睿皇帝一首

帝諱祁鎮宣宗長子建元正統十四年北狩皇弟邲王祁鈺奉皇太后令即皇帝位改元景泰尊帝為太上皇帝景泰元年帝還自迤北居南宮七年奪門復辟改元天順八年崩葬裕陵在石



門山距獻陵西三里謚曰法天立道仁明誠敬昭文憲武

至德廣孝睿皇帝廟號英宗有御製詩文一卷

### 漢江歌賜襄王

漢江滔滔出嶓冢兮偉茲巨浸壯南邦兮萬有千里流  
無窮兮逶逶迤迤志必東子於戲漢水殆與天地同始  
終兮

庾道南曰粵稽諸古大舜卿雲之歌文王鳳鳥  
之詩太和氤氲溢於帝藻逮乎漢祖大風之詞  
霸心猶在唐宗興慶之詠玉跡斯微惟吾皇祖  
親撰鍾山之賦及閱江諸詩英廟載製峴山之

賦及漢水諸詠直可追軼虞休上  
婉姬美豈漢唐諸君所可企及哉

詩詒裕陵以冲齡繼寶命即崇尚文治賜循良  
以招隱之歌及翠華返駕紫禁奪門而峴首襄  
陽頻頒宸藻昭同雲漢爛若星辰固知朔漢驚  
塵南宮夜雨文字之助所得良深耳御製詩文  
一冊後附寶文圖書春對酒帘諸作今亡襄王  
憲王瞻塔也仁宗第五子宣德四年受封之國  
長沙正統元  
年遷襄陽府

憲宗純皇帝 一首

帝諱見濟初名見深英宗長子建元成化在位

二十三年崩葬茂陵

在聚寶山距裕陵西一里

謚曰繼天凝

道誠明仁敬崇文肅武宏德聖孝純皇帝廟號  
憲宗有詩集四卷

闕里孔子廟詩

天生孔子縱之為聖生知安行仁義中正師道興起從  
游三千往聖是繼道統流傳六經既明以詔後世三綱  
五常昭然不替道德高厚教化無窮人極斯立天地同  
功生民以來卓乎獨盛允集大成實天所命有天下者  
是尊是崇曰性聖道曷敢勿宗顧予眇躬承此大業惟

聖之謨于心乃愜用之為治以康兆民聖澤流被萬世  
聿新報典之隆尤在闕里廟宇巍巍于茲重美文諸貞

石以光于前木鐸遺響於千萬年

成化四年六月

詩話茂陵撰文華大訓一十八卷以進學養德  
厚倫明治為綱聖敬日躋終始典學間留意於  
詩章益莊王勿齋集有恭次皇祖憲宗皇帝四  
景連環詩韻四首則當時天藻曾頒諸藩服惜  
乎今不得而見之矣

孝宗敬皇帝

一首

帝諱祐堂憲宗長子建元弘治在位十八年崩

葬泰陵

在史家山距茂陵西北二里

謚曰建天明道誠純中

正聖文神武至仁大德敬皇帝廟號孝宗

闕里孔子廟詩

聖人之生天豈偶然命之大君俾贊化權二帝三王君  
馬克聖繼天立極道形於政大化既洽至治斯成巍巍  
蕩蕩渾乎難名周政不綱道隨時墜孔子聖人而不得  
位乃稽羣聖乃定六經萬世之師於焉足徵自漢而下  
數千餘歲褒典代加有隆無替於皇吾祖居正體元六

經是師卓爾化原列聖相承先後一揆逮及朕躬思弘  
前軌廟貌載崇祀事孔裡經言典訓彌謹彌敦俗化治

成日升川至斯道之光允垂萬世

弘治十七年閏四月

李東陽記曰弘治甲子春正月重建闕里孔子廟成上親製碑文祝辭遣臣東陽申祭告臣東陽奉命以閏四月丁卯陞辭癸未至于廟衍聖公臣聞韶率族人迓于郊遠近大小來會者數百計前三日時雨降及期雨霽禮成之後星月朗耀神人懽暢歌工舞佾奉器執事之臣下逮胥吏僕從皆忻忻然如雲之從風水之赴壑有不令而集者敢紀成事用告來世若闡揚道德以彰教化則奎章宸翰昭如日星有目者所共覩臣何敢贊一辭哉  
朱國祚曰敬皇帝恭儉

慈恕寬仁愛人清閒之燕端坐肅然檢束身心  
謂嘗宜如是至于臨朝聽政剛毅果斷人莫敢  
撓而又霽色虛懷勵精訪落諫說雖切每見優  
容顧問大臣殆無虛日減膳節用尚德緩刑織  
造之役常紓蠲租之詔屢下十八年間與民休  
息培養太和跡其治效已庶幾于唐虞三代之  
盛矣

詩話泰陵聖學緝熙德修時敏非惟政事之勤  
實啓人文之化置永樂大典于便殿暇即省覽  
又命儒臣集歷代御製詩以為規範其賜李東  
陽靜中吟一首論者謂同二帝典謨三王訓誥  
馬帝既殂落羣臣哀輓之章徧於朝野有云日  
月無私照乾坤仰聖功孝可通金石誠能動鬼神  
雲容常具日露禱必深更歲早憂疑獄天寒憫  
戍兵近臣常造膝元老不呼名孝宗天子真聖

人平生好武復好文文多咨謀武籌畧坐鎮海  
宇清風塵李東陽詩也人間何日忘弘治天下  
茲辰哭孝宗楊一清詩也惻怛觸祖詔丁寧餽  
戍金儲懽詩也年年揮淚地不見長蒼苔顧璘  
詩也十年放逐同梁苑中夜悲歌泣孝宗李夢  
陽詩也彌留念諸將顧命託三公何景明詩也  
當時侍從者慟哭幾人存徐禎卿詩也祠官如  
可乞長奉泰陵園邊貢詩也誰期陵樹果猶許  
侍臣嘗王廷相詩也微官渾忘却惟記孝皇年  
鄭善夫詩也弓劍仙原閱謳歌帝德昭王謳詩  
也要其觸景傷情引端而出雖不足包帝德之  
大而公是之不可泯固灼然矣近聞史局有專  
毀泰陵非令主者將使是  
非混淆是不可以不辨

世宗肅皇帝二首



帝諱厚燠興獻王子憲宗之孫武宗無子入繼

大統建元嘉靖在位四十五年崩葬永陵

在陽翠嶺

距長陵東  
南三里

謚曰欽天履道英毅聖神宣文廣武

洪仁大孝肅皇帝廟號世宗有御製詩賦集共

### 七卷

御經筵講大學衍義有感賦此

帝王所圖治務學當為先下作民之主上乃承之天致  
治貴有本本端化自平人君所學者其序有後前正心

誠其意志定必不遷吾志既能定理道豈復顧身修本  
心正家國治同然國治乃昭明萬邦斯協焉於變帝堯  
典思齊文王篇萬國修身始朕念方拳拳

張萱等重編內府書目曰嘉靖六年大學士楊  
一清賈詠翰林學士翟鑾進講大學衍義御製  
一言古詩一章用金龍箋書一清等恭和集為  
一冊名翊學詩降勅諭荅上用欽文之寶勅首  
三臣銜皆  
御筆也

賜賈詠詩

卿本中州俊簡在登台衡君臣際良難所貴德業并朕

固亮卿志夙夜懷忠貞卷阿有遺響終聽鳳皇鳴

譚希思曰帝博綜經史親禮儒臣平臺召對西苑賡歌藹然如家人父子然終不少假以威福纂言屬意直抒自得往往有發前聖所未發者

詩話世廟受天永命樂備禮明尤勤勤於韻語當時受賜者郭武定勛費文憲宏楊文襄一清石文介珏張文忠孚敬李文康時夏文愍言朱尚書衡他若席文襄書以病目期以弼亮趙尚書鑑以致仕嘉其止足龍箋御墨往往傳之世家而一清當歸田時武皇南巡親幸其第賜之絕句十二首其在政府詠元宵有愛看冰輪明似鏡之句世廟以其類中秋易以愛看金蓮明似月兩朝寵遇宸翰煒煌尤稱千古盛事云

神宗顯皇帝 二首

帝諱翊鈞穆宗莊皇帝長子建元萬厯在位四

十八年葬定陵

在大峪山距昭陵北一里

謚曰範天合道哲

肅敦簡光文章武安仁止孝顯皇帝廟號神宗

有集一卷

畫眉山龍王廟碑詩

有序

畫眉山龍王廟在都城西一舍其地故有泉潭  
相傳以為龍之所居即其翁為廟祀龍王焉成

化士辰憲宗純皇帝禱雨有應新其廟而勒辭  
於豐碑萬厯十有三年春夏不雨麥稼焦枯以  
五月往禱于廟決旬之間嘉澍屢霈郊野霑足  
三農忭舞爰出內帑金錢重增葺之為之記而  
系以銘詩

於赫龍王不顯其光上下帝裔嗟翕無方為雷為霆為  
雲為雨有開必先靡求不與我求伊何忝稷稻梁爾與  
伊何千倉萬箱眉山之下龍王之宇迄用康年穀我士

金史卷一百一十五  
卷一  
女

遼縣景命殿詩

實錄萬歷三十六年勅建景命殿于遼縣永樂  
店聖母皇太后誕育之地上御製碑文系之以  
詩

翼翼京邑遼水滌之璇源遠濬載奠坤維尊靈長樂歡  
洽重闈縣縣景命百祿咸宜睠茲湯沐啓瑞集禧周原  
膺膺寶殿攸基重門邃閣崇敞逶迤仁祠左拱靈宇右  
麗甍連棟接鳥革翬飛虹祥式闡慈念載怡爰及薄海

耀景咸熙聖母之德綏此蒸黎百千萬禩永永無墮

沈德符曰帝啓年即工八法賜江陵吳門諸輔臣堂扁已極偉麗其後漸入神化批荅詔旨間有改竄龍翔鳳翥運筆之妙有顏柳所不逮者可謂天縱多能矣

詩話定陵筆精墨妙嘗觀先文恪公暨唐文恪公殿試卷御書第一甲第一名六字皆瘦硬通神餘如來青閣海宸諸扁亦然嘗序草韻辨體一書備古今翰墨之變內府向藏御製詩文一卷今已無存列朝詩集所載勸學詩一章未必出于御製也謹錄龍王廟景命殿二碑銘詩廟在畫眉山俗名金山口成化中禱雨有應而建是碑立于萬歷十三年殿在郿縣永樂店萬歷三十六年勅建為孝定皇太后祝釐俗所稱九蓮菩薩者是

莊烈愍皇帝 一首

帝諱由檢光宗貞皇帝第五子天啓七年以信

王入踐位建元崇禎臨御十七年寇陷京師殉

社稷葬思陵

在鹿馬山

賜石砮土司秦良玉

蜀錦征袍手製成桃花馬上請長纓世間不少奇男子

誰肯沙場萬里行

王世德曰四川石砮土司女帥秦良玉帥師勤王召見賜綵幣羊酒銀牌御製四詩旌之帝即



位春秋方十七魏璫竊國柄積威震天下乃不  
動聲色翦除之其才豈中主所可及而畏天災  
遵祖訓勤經筵崇節儉察吏治求民瘼種種聖  
德朝野共聞使得才堪辦賊之臣為之輔君臣  
一德將相同心則太平何難致乃不  
幸有君無臣卒致身殉社稷悲夫

詩話思陵聖學時敏甲乙之夜不輟經書又妙  
解音律嘗于深宮鳴琴製於變時雍之曲躬幸  
太學御經筵會粹四聲之書特擢五經之士用  
人惟已立賢無方萬幾餘暇灑墨為行草書龍  
跳虎卧嘗書視民如傷望道未見八字于便殿  
詩不多作然長牋小扇往往流傳人間其最傳  
者賜秦良玉楊嗣昌五絕句也良玉者石砭掌  
印宣撫使其兄邦屏邦翰皆以援遼力戰死幼  
弟民屏被創潰圍出歸不能視事諸部以良玉  
忠勇多大畧遂襲宣撫使敗奢崇明于佛圖關

破安邦彥于平越功居第一野紀謂良玉有男  
妾數十人而夔州李吉士長祥力辯其誣謂川  
撫嘗遣陸縣州遜之按行諸營良玉冠帶飾佩  
刀出見設饗禮酒數巡論兵事遜之誤曳其袖  
良玉引佩刀自斷之其嚴肅若是張獻忠僭號  
四川良玉號叱曰吾兄弟三人皆死王事吾以  
一婦人受國恩二十年不幸至此其敢以餘年  
事逆賊哉悉召所部約曰有從賊者殺無赦獻  
忠鑄金印齎之易其官不為動賊黨無敢入其  
境者亦勝于丈夫矣思陵葬日皇朝未收江  
南福藩稱制遙上帝謚曰紹天繹道剛明恪儉  
揆文奮武敦仁懋孝烈皇帝廟號思宗后謚曰  
孝節貞肅淵恭莊毅奉天靖聖烈皇后尋改帝  
廟號曰毅宗唐藩稱制復改威宗皇朝順治  
初更謚帝曰欽天守道敏毅敦儉弘文襄武體  
仁致孝懷宗端皇帝后曰孝敬貞烈慈惠莊敏

承天配聖端皇后既而改稱莊烈愍皇帝凡五  
易而後定焉今神牌所書即順治初定一十六  
字第其下改書莊烈愍皇帝云當李自成陷京  
師思陵將殉社稷傳旨後宮令自裁而宮監王  
永壽從懿安皇后宮至白帝曰懿安皇后業自  
縊矣帝連稱好好乃走煤山經於海棠花下福  
藩遙上懿安后諡曰孝哀慈靖恭惠溫貞偕天  
協聖哲皇后詔云既慷慨以捐軀亦從容以就  
義而順治實錄于甲申五月大書莫明崇禎帝  
后及天啓皇后張氏於昌平州陵國史存據可  
以無疑其後有魏忠賢養女任氏進之德陵立  
為貴妃寇亂後流轉民間詐稱天啓皇后因送  
於官光祿寺月有廩給人遂疑后失節沉寃莫  
雪故附白之又按明自太祖至愍皇帝累朝多  
有御製詩文或傳或不傳敬錄十帝之詩于卷  
首若武宗南巡過鎮江幸大學士楊一清第賜

以十二詩命其和韻自題錦堂老人又于宣府製小詞有野花偏有色村酒醉人多之句傳誦人間惜乎未覩其全也

昭皇后一首

后姓張氏永城人彭城伯麟女洪武二十八年冊為燕世子妃永樂二年封皇太子妃二十二年仁宗即位冊立為皇后正統七年崩合葬獻陵謚曰誠孝恭肅明德弘仁順天啓聖昭皇后送司寶黃維德歸南海

皇朝列聖御寰宇偉烈宏謨冠千古重惟仁化本家邦  
內庭百職需賢良咨爾惟德女中士自少從容知禮義  
一從應召入皇宮夙夜孜孜勤乃事昔時黑髮今如霜  
歲月悠悠老將至九重聖主天地仁欲使萬物同陽春  
體茲德意賜歸去乃心感激情忻忻嶺海迢迢千萬里  
潞河官檣春風裏賜衣宮錦生光輝親戚相迎人總喜  
喜爾富貴歸故鄉我心念爾恒不忘彩筆題詩意難盡  
目極天南去鴈翔

明詩綜卷一

欽定四庫全書

明詩綜卷二

翰林院檢討朱彝尊編

周定王櫺

六首

王高皇帝第五子洪武三年封吳十一年改封

周洪熙年薨著元宮詞一卷

靜志居詩話元宮詞百首宛平劉效祖序稱周恭王所撰固為繆矣列朝詩集作周憲王亦非也其自序云元起沙漠其宮庭事蹟無足觀者然要知一代之事以紀其實亦可備史氏之采

擇馬永樂元年欽賜予家一老嫗年七十矣迺  
元后之乳姆女常居宮中知元舊事間嘗訪之  
備陳其事故予詩百篇皆元宮中實事亦有史  
未曾載外人不得而知者遺之後人以廣多聞  
焉末書永樂四年春二月朔日蘭雪軒製按序  
所云元宮詞當是定王作考定王以洪武十四  
年之國至洪熙元年薨序題  
永樂四年則為定王無疑矣

元宮詞六首

大安樓閣聳雲霄列坐三宮御早朝政是太平無事日

九重深處奏簫韶

玉京涼早是初秋銀漢斜分大火流吹徹洞簫天似水



半鉤新月挂西樓

背番蓮掌舞天魔二八嬌娃賽月娥本是河西參佛曲  
把來宮苑席前歌

月宮小殿賞中秋玉宇銀蟾素色浮官裏猶思舊風俗  
鷓鴣長遂序梁州

江南名伎號穿鍼貢入天家抵萬金莫向人前唱南曲  
內中都是北方音

興聖宮中侍太皇十三初到捧鑪香如今白髮成衰老

四十年如夢一場

蜀獻王椿一首

王高皇帝第十一子洪武十一年封二十三年

之國成都永樂末薨有獻園集

詩話明開國諸王文學皆稱蜀府孝陵恒以蜀秀才呼之惜獻園集罕傳於世王孫定王友垓有集十卷曾孫惠王申鑒有惠園集惠王孫成王讓桐有長春競辰集成王孫端王宣圻有端園集五葉皆有集著錄亦盛事也

送方希直先生還漢中

岷山峩峩江水泱泱我疆我理俾我以康靡言匪衣靡  
善匪得閱士孔多我敬希直侍我經筵不倦以勤非德  
不言非道不陳職思其歸義不可奪采采者芹侑教如  
渴爰秣其馬爰振其衣拜手稽首載辭而歸昔者之來  
春日遲遲維今之歸涼風淒淒悠悠我心念子良苦爰  
命詞臣飲餞江滸王道如砥旣歌且詠八月初吉抵于  
南鄭汚彼江漢亦合而流瞻彼岷峨鬱其相繆心之知  
矣臨別繾綣子如我思道豈云遠

湘獻王柏一首

王高皇帝第十二子洪武十一年封之國荊州

建文初或告王反王無以自明闔宮焚死謚曰

戾成祖更謚曰獻

朱睦㮮云王嗜學讀書開景玄閣以延士被服儒雅尤善

道家言嘗自號紫虛子

太和山尋張三丰故居

張玄玄朝飲九渡之清流暮宿南巖之紫烟好山浩劫  
知幾度不與景物同推遷我來不見徒悽然孤廬高出

古松頂第有老猿接臂相攀緣

遼簡王植 二首

王高王帝第十五子洪武十四年封二十六年  
之國遼東廣寧州永樂二年遷荊州二十二年

夢有遺集

詩話簡王遺集五卷曾孫惠王恩鏞所刊大率  
不經意之作所與酬和程通鍾洪範林源曹鐸  
吳鼎項允清朱恠胡俊王用才胡庭  
禮之徒咸無詩名宜其淮南自尊也

暮春

金史四庫全書  
卷二  
鞍馬辭京去維時已暮春殘花留舞蝶飛絮逐行人樹  
暗啼黃鳥波激躍紫鱗白雲晴冉冉瞻望重思親

秋江

楊柳渡頭烟漠漠  
我眉山下水漣漣  
月明沙渚晚風急  
漁笛一聲江上秋

寧獻王權

三首

王高皇帝第十六子洪武二十四年封二十七  
年之國大寧永樂二年移南昌正統末薨有采

芝吟

詩話獻王助長陵靖難以善謀稱及徙封豫章  
頗多缺望晚乃折節讀書開雕祕笈囊雲廬山  
之巔鼓琴緱嶺之工其  
有淮南八公之思乎

宮詞 三首

忽聞天外玉簫聲  
花下聽來獨自行  
三十六宮秋一色  
不知何處月偏明

太液池中翻翠荷  
小娃學唱采蓮歌  
畫船不繫垂楊下  
盡日隨風漾碧波

庭梧秋薄夜生寒誰把瑩篴別調彈睡覺滿身花影亂  
池塘風定月團團

漢庶人高旻一首

庶人文皇帝第二子永樂二年封漢王十五年  
之國樂安州宣德八年叛繫逍遙城死國除有  
擬古感興詩

擬古

自古寺人職司閤供灑掃秦漢始撓政國本亦枯槁唐



初任猶輕高貴在天寶淪胥宣懿間神器猶顛倒門生  
詆天子尊重壓元老社稷遂已墟羣閹那自保嗟哉太  
宗業家奴壞王道後世宜鑒之慮患防須早

周憲王有燉二首

王周定王長子高皇帝孫洪熙元年襲封景泰  
三年薨有誠齋錄新錄

詩話憲園留心翰墨譜曲尤工中原絃索往往  
藉以為師李景文夢陽詩云齊唱憲王新樂府  
金梁橋外月如霜牛左史恒詩云唱徹憲王新  
樂府不知明月下樊樓是也其詩不事嘔心頗

能合格梅花牡丹玉堂春一題動  
成百詠才思不窮誠宗藩之雋矣

竹枝歌二首

五溪春雨杜鵑時桂嶺西風八月期  
一帶湘山南北路

請郎聽唱竹枝詞

春風滿山花正開春衫女兒紅杏顚  
儂家盪漿過江去  
試問阿郎來不來

楚莊王孟炆一首

王昭王楨之子高皇帝孫永樂二十二年襲封

正統四年薨有勤有堂詩集

九峯寺

細路千盤迴高峯九疊竒松陰深入寺泉脈遠通池雲  
鎖禪棲室巖鑄御製碑來游乘暇日林下盡幽期

魯靖王肇輝二首

王荒王檀之子高皇帝孫永樂元年襲封成化  
二年薨有憑虛景

詩話魯藩別乘首載靖王詩但著集名詩有過  
覺社湖及游朝天宮登鍾山謁孝陵作知是王

金匱要略卷二  
朝南京時  
所賦詩

江樓秋望

百尺危樓上憑高極杳冥水雲連楚白島嶼入淮青潮  
起魚龍窟風生蒲蓼汀倚闌凝竚久目斷是滄溟

秋日江行

策馬行行出郭遙平沙水落未生潮楓林兩岸經霜老  
紅葉無風落小橋

秦康王志潔一首

王隱王尚炳第三子愍王棟之孫高皇帝曾孫  
也宣德三年以富平王進封景泰六年薨有默

菴集

送醫士凌漢章還茗

術傳盧扁字鍾王底事來遊便趣裝熟路也知車載穩  
清時何用劒生鏐雞鳴角谷三更月楓落吳江兩岸霜  
歸到茗溪尋舊侶畫船詩酒水雲鄉

楚憲王李垓一首

王莊王之子高皇帝曾孫初封武陵王正統五

年襲封八年薨有毓秀軒集

詩話憲園夢筆符於文通述德  
同乎靈運九原可作寧魏河間

衡山

衡山高峩峩根盤幾百里危峯插層霄巨岳奠南紀空  
中紫蓋峰有若芙蓉蕊欲泛洞庭舟瀟湘正秋水

魯惠王秦堪

一首

王靖王嫡子高皇帝曾孫成化三年襲封九年

夢有悔齋稟

春晴

膏雨初收日載陽  
眼前景物富韶光  
碧池一夜水平岸  
紅杏數枝花出牆  
芳草不隨萸英換  
游絲欲共柳條長  
海棠庭院偏明媚  
莫遣東風又作狂

魯莊王陽鑄 三首

王惠王嫡子高皇帝玄孫成化十二年襲封嘉靖二年薨有尊德堂稟

詩話註王朱邸優游不忘恭敬情親棣萼於弘  
治癸亥聚兄弟于一堂王始倡七言近體二首  
于是鉅野恭定王陽荃樂陵宣懿王陽鎰鄒平  
恭懿王陽鎰東阿榮靖王陽鏐鎮國將軍陽銖  
陽鉞陽鑾陽鉞並和之工繪為圖左長史郁珍  
右長史石磐紀善芮錫紀其事陽銖為作序焉  
王有介山懷古作中一聯云古冢已無  
雙鶴弔荒林猶為一蛇憐亦佳句也

### 塞上逢故人

久歷風霜鬢欲華故人相憶各天涯幾年出塞常為客  
今日逢君似到家薄酒暫宜酬雪月敝衣堪歎染風沙  
明朝又恐河梁別愁聽江城奏暮笳



秋日閒居

地僻柴門靜不開  
明牕虛室絕塵埃  
應無酷吏催租到  
忽有白衣送酒來  
坐聽風聲敲翠竹  
吟看日影上蒼苔  
乘閒歲月心無累  
客至須留泛酒杯

江樓秋望

江城秋暮葉初飛  
獨上高樓望夕暉  
忽見一行沙鴈起  
西風遙送片帆歸

唐成王彌錦一首

王莊王芝址庶長子定王桎曾孫高皇帝玄孫也初封潁昌王弘治二年嗣爵嘉靖二年薨有

甕天小亭

詩話成王廣置精廬集國中俊秀子弟資給之俾肄業又闢蔬圃一區建養正書院泰陵頌五經子史賚之迨康陵游幸王作憂國詩八章以諷暇則聯句藏春之塢開講保和之堂又精於書法繪事皆入能品云

久雨

春雨同秋雨輕寒作峭寒鶯聲猶窘澀花片漸摧殘宿

霧難開日層波正湧瀾韶華寧久戀轉眼惜春闌

唐恭王彌鉗 一首

王莊王第三子成王彌鉗之弟定王桎曾孫高  
皇帝玄孫初封交城王正德中薨謚恭靖後以  
子宇溫襲王改稱唐王定謚曰恭有謙光堂詩

集

詩話恭王下筆不能自休  
一韻每至百篇未免率易

宮詞

長門芳草綠茸茸  
輦路年來草漸封  
怪殺海棠花上月  
夜深偏照繡幃重

潘安王詮鉢一首

王潘莊王幼壻次子簡王模曾孫高皇帝玄孫  
也初封靈川王正德四年薨謚榮毅後以孫憲

王胤移進封更謚安有凝齋亭

李騰鵬云王所  
作如太羹玄酒

不求濃麗而至味有餘令人  
嗜之不厭絕句更有新意

春日有懷

小圃辛夷漸發芽禁城殘柳欲飛花最憐九十春光去  
未遂還家只夢家

秦簡王成泳八首

王惠王公錫之子康王之孫高皇帝來孫弘治  
元年以鎮安王襲封十一年薨有賓竹小鳴橐

詩話王年十齡嫡母陳妃以唐詩教之日記一  
篇嗣位後日賦一篇三十年廡間至于延致士  
大夫脫畧勢分撤鷹房以初儒臣之館闕隙地  
以益書院之基善行匪一許伯誠過墓詩云河  
間明禮樂淮海好神仙則并留心服食之術矣  
既薨紀善強晟校刻其詩嘉靖初王孫定王惟

焯表上之  
詔送史館

楊白花

楊白花隨風無定止飄然一去太無情飛度江南幾千  
里可憐落水化浮萍浮萍無復隨風起宮中美入連臂  
歌此情不斷如春水

折楊柳

靈州城下柳多被官軍竊猶餘拂地條更苦行人折今  
君赴玉關將何贈離別

西城路

西城路半是平田半墳墓平田漸少墳漸多酸風苦雨  
泣銅駝人生少年胡不樂世間那有蘇耽鶴

感寓 三首

為善為君子君子喻于義為惡為小人小人喻于利所  
喻既不同善惡豈相類義利自兩塗理欲所由異譬之  
食飲然而各有所嗜惡臭與馨香伊人自知味吁嗟義  
利門慎毋迷厥志

仲尼初相魯魯人興謗辭子產聽鄭政鄭人亦毀之人  
心苦不同衆口生瑕疵賢聖且不免吾人莫嗟咨

相君椒百斛領軍糗一屋為利日孳孳于心苦無足貪  
夫出見客佩鑰聲相觸算緡極錙銖餬口損饘粥恨不  
馬重駒恨不牛兩犢家盈萬鎰金身兼九州牧憫彼心  
太勞一笑捧吾腹

武功道中

五原三時隔西東此地人言是武功楊柳池塘科斗水



杏花村店酒旗風  
農耕綠野春  
臺裏客在青山  
罨畫中  
日暮官程催去馬  
樹頭微雨正濛濛

春游曲

新柳迎游騎  
飛花趁酒甌  
年年三二月  
爛醉曲江頭

肅靖王真澂二首

王恭王貢鏞之子  
高皇帝來孫  
莊王模玄孫成  
化中封世子  
嘉靖五年薨  
以子定王弼  
枕襲王  
追謚有星海集

詩話宗正謀璋稱靖王塞上曲旨趣沈雄王龍  
標不能過未免譽失其實要其風格駿駿唐人

塞上

黃雲白草出關多颯颯風吹積石河  
少婦愁添閨裏思  
征人淚落隴頭歌

步虛詞

瑤壇深處磬聲微羽客朝元午夜歸  
劍佩幾回翔碧落  
天風吹冷六銖衣

潘憲王盾移

二首

王惠王勛智之子安王孫簡王來孫高皇帝昴  
孫也自號南山道人嘉靖五年封靈川王九年  
懷王胤楨絕奉勅管理府事十年進封二十年

夢有保和齋

謝榛云王素嗜談禪詩亦有妙悟  
李騰鵬云王詩沉著痛快

時出新語多  
得性情之正

詩話憲王以好學聞嘗上書乞內府諸書永陵  
以五經四子書賜焉枕上詩云展轉殊無寐深  
秋感二毛城鴉催曉色庭樹起寒濤往事意何  
拙浮生心自勞河間今已矣寧不愧吾曹蓋以  
自勉云

送汪內史南歸

滄江遠渚暮烟收  
南望千山樹色秋  
明日別君漳水畔  
相思還上驛西樓

秋鴈

北來征鴈下寒塘  
水食沙眠足稻梁  
不寄行人一封信  
却回何事到衡陽

趙康王厚煜

五首

王文皇帝第三子趙簡王高燧之來孫正德十

六年襲封嘉靖三十九年薨有居敬堂集

穆文熙云

康王詩雄渾  
迴出時作

詩話崑山鄭若庸曳裾王門康王從若庸所見  
臨清謝榛竹枝詞命所幸琵琶妓賈扣度而歌  
之旣而榛過鄴偕若庸見王王宴之便殿酒行  
樂作王曰止命絃瑟以琵琶佐之曰此先生所  
製竹枝詞也譜其聲不識其人可乎命諸伎擁  
姬出拜榛謝曰此山人鄙俚之詞請更製竹枝  
以備房中之樂王曰幸甚榛力不勝酒醉卧山  
亭下王命姬以衽代薦承之以肱明日上新竹  
枝十四闕姬按而譜之元夕便殿奏伎酒闌送  
客即盛禮而歸賈乎榛耶王嘗與榛聯句百卉  
亭鄭謝之外若顧聖少仲春龍尤莊  
輩皆王客也平臺小山無此盛事

擬秋夜長

漫漫秋夜長唧唧寒蛩吟白露下青草悠悠傷我心傷  
心耿不寐孤坐鳴素琴朱絃中斷絕轉軫悲餘音推琴  
步微月仰見雙飛禽緬懷牧犢子潛潛淚沾襟丰神宛  
如在悵望空梁陰

戎寇

聞說西羌種今秋復寇邊三軍憂戰伐百里絕人烟衰  
草依孤壘寒雲起暮天九重宵旰切何日下祁連

七夕後作

銀河昨夜渡牽牛  
玉露涼侵院院秋  
一葉芭蕉數聲雨  
人間何事不堪愁

宮詞

薄鬢斜鬟十五餘  
妝成猶未下庭除  
納涼記得君王作  
私把泥金小扇書

聞砧

瑤琴停響綠尊空  
何處寒砧擣月中  
最是今宵最愁絕

碧梧陰下粉牆東

益莊王厚煜

四首

王端王祐櫝之子憲宗之孫藩封建昌府嘉靖

二十年襲封三十五年薨有勿齋集詠史詩

詩話註王留心理學序莫氏學業須知張氏理  
學類編陳氏道學傳趙氏學範以行又博覽經  
史撰勿齋臆說正謠糾謬不異儒生爵儀王孫  
藩獻志稱其聲色珠綺一無所好蓋天下之賢  
王也集五卷弟崇仁王厚炫嗣封編輯  
以行分校者左長史張默右長史李牧

春鴈



北上三湘路南辭七澤雲已甘同出塞不忍更離羣永  
夜空中唳幽人枕上聞汀洲爭宿處昧旦起紛紛

早秋

庭樹初飛葉天高爽氣澄檻花藏晚蝶簾竹聚秋蠅紅  
熟枝頭棗青浮水面菱金風蘋末起頓喜失炎蒸

秋熱

節已過寒露秋陽尚逼人蒲葵仍在手荃葛未離身  
離落黃花綻階除綠草勻憂時占月令休咎竟何因

新晴

連旬淫雨降今喜見朝暎徑路泥猶滑池塘水尚渾輪蹄喧野市網罟曬漁村風掃殘雲歛青山復對門

蜀成王讓栩五首

王昭王賓瀚之子高皇帝舅孫正德五年襲封  
嘉靖二十六年薨有長春競辰集

楊慎云成王懷古雜擬式

遵溫柔救原之旨

詩話長春競辰集成都楊慎序之而升菴集不載宮詞一百雖題曰擬古然如翠華一去寂無

蹤疑諷康陵而作只恐君王  
道院行疑諷永陵而作也

玉階怨

落日下西苑深宮風雨多定嫌蒼蘚滑玉輦不曾過

早秋

郊原正早秋露下蘆汀濕忽見一禽來只傍疎枝立

擬古宮詞

三首

青春一去豈重來轉轂韶光日夜催三百六旬空悵望

朱門經歲不曾開

紫禁鴉啼曙色明麗譙隱隱不聞聲各宮裝束焚香候  
只恐君王道院行

新觀玉歷識正初泰運三陽謁帝居御座今安圓閣子  
內中欲置女尚書

潘宣王恬爻

二首

王憲王次子高皇帝仍孫自號西屏道人嘉靖

三十一年襲封萬厯初薨有綠筠軒橐

穆文熙  
云宣王

音調超拔綽有陳思之風 李騰鵬  
云王所作和平爾雅諸體各擅其長

詩話宣王逸思  
清才金枝之秀

秋興

池閣蕭條竹徑通  
閒來幽興檢詩筒  
未須絃管翻新曲  
自有琴尊對晚風  
斜日斷雲簾影外  
疎林落葉杵聲中  
悲秋莫話當年事  
且向遙天數塞鴻

山行

為訪林棲叟  
何妨石逕長  
白雲生谷口  
處處藥苗香

潘定王珵堯二首

王宣王之子高皇帝雲孫嘉靖三十七年封世

子萬歷十二年襲封天啓元年薨有修業堂崇

玉山房二橐

穆文熙云王詩音韻悠揚若扣洪鐘餘響不絕李騰鵬云王諸作

音節鏗鏘詞氣間適有韋柳風非富貴人所能道

詩話定王師呂時臣猶沈易之師謝榛也所師高下不同體制亦少遜

### 擬古宮詞

聞道收遼左中宮上壽危隨班春殿裏消息未全知金

縷麒麟服傳宣賜太師

李騰鵬云足稱大雅

秋宮怨

月落湘簾錦瑟傳  
西風高下度流螢  
不知今夜長生殿  
誰看牽牛織女星

鄭世子載堦

二十五首

昭皇帝第二子鄭靖王瞻堦歷四世為恭王厚  
婉嘉靖二十七年建言時政降為庶人發高牆  
禁錮隆慶元年赦回復爵王恭王子著樂書

補亡詩

金匱要略卷二  
南陔有風吹彼芭棘厥景婆婆欲靜弗得孝子事親當竭其力父母之恩昊天罔極

南陔有風吹彼桑梓慕我父母終身敬止勗哉伯仲以及娣姒恪爾晨昏絜爾甘旨

景薄桑榆日亦云暮父母俱存兄弟無故雖有至樂寧不深慮一則以喜一則以懼

右南陔三首

嗟彼白華瑩然如玉君子立身必慎其獨無貽親辱



嗟彼白華瑩然如琇君子立身必謹所守無貽親咎  
嗟彼白華瑩然如霜君子立身如圭如璋為親之光  
嗟彼白華瑩然如雪君子立身清清絜絜庶無玷缺  
嗟彼白華瑩然如冰君子立身戰戰兢兢庶無怨憎

右白華五首

彼華者黍彼實者稷相彼秋成時萬時億  
彼華者黍彼實者麥時和歲豐困盈倉積  
彼華者黍彼實者菽農夫之慶邦家之福

彼華者泰彼實者麻君子愛民不驕不奢  
彼華者泰彼實者木君子愛物不溢不過

右華泰五首

天運元亨萬物由庚王道正直蕩蕩平平  
寒暑以序雨暘以時百穀用成庶績咸熙  
草木蕃庶鳥獸咸若仰觀鵞飛俯窺魚躍  
習習景風甘雨其濛醴泉洩洩玉燭融融

右由庚四首

瞻彼崇丘積土成高相彼大海積水成濤  
卷石積多其形嗟哉勺水積久勢若江河  
寶藏貨財靡所不足積善之家必有餘福  
鳥獸魚龍咸遂其性積善之家必有餘慶

右崇丘四首

肅肅令儀君子由之秩秩彞倫君子求之率性之道君  
子修之

何謂彞倫父子有親君臣有義朋友有信兄愛弟敬夫

和妻順

君令臣恭父慈子孝夫妻相敬兄弟相好惠于朋友無德不報

維物有則維民秉彛好斯美德由此令儀上和下睦皞皞熙熙

右由儀四首

詩話世子研精樂典按律審音察及銖黍歷辨  
劉歆何晏李照范鎮陳暘蔡元定之失近代若  
李文利李文察劉源張敬皆駁其非所著樂書  
歷論宜采八國史迹其補亡詩六篇際括古訓

比之夏侯湛束皙似為過之至於念嚴君之因  
席藁門外因長幼之序讓國盟津尤非人所幾  
及

光澤蔡端王寵瀛一首

王遼惠王成鍊次子高皇帝來孫成化二十三

年封嘉靖二十五年薨有博文堂豪

何喬遠云  
王積書萬

卷世宗賜堂  
名曰博文

登仲宣樓懷古

憶昔登樓日天涯事轉違計依劉表得書授蔡邕稀南

國方羈旅西京未解圍秦川空在眼公子乃忘歸

衡陽安懿王寵淹

一首

王悼僖王恩錯子高皇帝來孫弘治六年襲封

嘉靖十八年薨

登仲宣樓懷古

尋芳踐嘉約乘暇一登樓野樹連雲合清江繞郭流遺  
文鄴下重舊井岷山留洵美開襟地無妨續勝遊

永壽恭和王秉櫬

一首

王莊僖王誠淋子高皇帝昴孫弘治十年襲封  
嘉靖十七年薨

正德己卯九日登說經臺

隱隱樓臺雲外重一溪活水過仙宮上師已化青牛老

萬木驚秋墜晚風

顧炎武曰是詩刻石草樓

武岡保康王顯槐二首

王楚端王榮滅第三子昭王來孫高皇帝昴孫  
也嘉靖十七年封有少鶴山人正續集

詩話王詩平  
正無溢幅

走狗烹

走狗烹走狗烹  
蒯生識鑒通神明  
漢基甫創身即死當  
日假王何為爾  
相面止封侯  
相背貴無極  
淮陰聞言兩  
耳逆婦人擅執生殺權  
猶豫自將身  
弃捐噫噫英彭尤  
可憐

次鄒卹部穎泉謝宴

小園一雨足  
次第百花開  
江白孤舟去  
天青一鳥來  
林



香時撲坐柳色競侵杯借問西鄰客懷人日幾回

德平榮順王肩樞

一首

王藩惠王勛潛之次子高皇帝昴孫嘉靖三十

七年封有集書樓豪

李騰鵬云王所作沉著嚴整不尚綺靡自饒深致

送焦明府之鳳翔

馬首蠶叢路茲行亦壯游天青三峽曉雲碧萬山秋鷺浴盤渦水猿啼古驛樓君才非百里早晚夢刀州

鎮康王恬焯

一首

王藩憲王肩栢第五子高皇帝仍孫嘉靖二十

四年封有西巖漫橐

穆文熙云王詩調高意永自是盛唐風味謝榛云

西巖題瞻遠樓詩江樓懸樹  
杪山色到牕中精拔有骨

同呂二人話別

此會情何極明朝遽別筵  
霜清楓葉路秋老菊花天  
百越家鄰海三垂地近邊  
相思應有賦月定幾回圓

保定惠順王珵坦

一首

王藩宣王次子高皇帝雲孫嘉靖三十八年封

有清苑山房集

穆文熙云王詩格調高古思致雋永當于貞元中求之

李騰

鵬云王善書法其詩音格響亮

春日游柏谷寺

曉霧危巖合烟蘿仄徑懸浮圖開佛日沙界接人天獨  
鶴衝雲起愁雲枕石眠逃禪如可醉莫負杖頭錢

沁水昭定王恬嬾一首

潘簡王第八子悼懷王佖煊封沁水王簡王來  
孫高皇帝昴孫也嘉靖二十五年襲封四十年

夢有遜學書院集

春日閒述

睡起情逾嬾  
烟蘿地自迷  
開尊惜遲暮  
片月挂松西

沁水王瑀塔一首

王昭定王子高  
皇帝仍孫隆慶元年襲封有滄

海披沙集

穆文熙云王詩丰神俊逸思致雅澹大歷前之調也李騰鵬云王所作

爾雅典麗蓋荆金楚玉也

彰法寺

嶽勢何穹窿躋攀竟日至絕澗來巖椒沿洄轉幽邃其  
陽開招提不知幾千歲宮殿羅虛空俯視下無地樵子  
雲際行石磬風前墜境疑兜率天巖紀司空字日晏憺  
忘歸暫遠塵煩累

安慶王怙爚

二首

王藩憲王第七子高皇帝仍孫自號西池道人

嘉靖三十一年封有嘉慶集

何喬遠云王于穆  
宗朝以孝敬旌

李騰鵬云王詩和平  
爾雅已入作者之門

夏夜寄懷謝山人時客汾陽

良夜孤清賞懷君倍黯然離居三歲似明月幾回圓紫  
塞雲邊樹青山雨後天相思寫不盡寂寞有水絃

聞砧

何處砧聲急空閨入夜聞哀音流素月寒響徹秋雲夢  
斷盧龍遠天高白鴈分誰能將妾意萬里報夫君

慶成王慎鍾 一首

晉恭王柵第四子濟炫封慶成王謚莊惠王安

穆王知嫌之孫恭王之仍孫高皇帝之雲孫也

隆慶六年襲封有太霞臺

穆文熙云王以賢孝稱其器質敦厚醇雅

詩亦有體裁不失風人遺旨

### 夏日登萬佛樓次朱使君韻

天半峇崙峻閣開自公多暇興悠哉憑虛幾見空王在  
結夏誰招使者來貝葉迎風翻鹿苑香雲散雨落蜂臺  
倚闌欲和陽春曲慚愧登高作賦才

明詩綜卷二